

ĒFĒSUS

E Pöl to kiun voh o taana' kiun, e' he te' non Room pa nohnoh. O pöh kiun ne' to va nö manuh pa napan va po vaman to te' ne pa vöön vëh Ēfēsus, ko meh ne' to va nö manuh pa napan va pa vöön vëh Filipaë, ko vakön ne' to vanö manuh pa napan va pa vöön vëh Kolosi, ko vataana' ne' to nö manuh pe Pilimon. E' to kiun ke ra napan va Ēfēsus o kiun vëh, pan ee se ëh momoan voh ko vahik po', ka napan va po vaman to te' ne pa ma meh vöön pah ëh po'.

A Ēfēsus voh a vöön apuh pare' te' non manih pa muhin va Esia'. A napan poë varih to te' voh ne nën, to te' voh ne o iu apuh va pa öt a ma moeh tah peo, pare he' voh i rea pe sosoenën vapikpiuk nee to poka' ne e Atemis. E' to te' me voh non a iuun hinhin pe Atemis a pah vih manih Ēfēsus (Aposol 19:17)

Manih pa vapöök vavih pe Pöl, e' to he' a soe nën manih po Jiu' po Poen Apaapo (Aposol 18:18-21). Ka manih pa vaköön vavih pe', ne' to nö Ēfēsus ko te' non nën po kukön kirismas pa vavaasis a napan, (Aposol 19). A nap peo va Ēfēsus to hikta te' ne pan ee ro Jiu', ivëhkëk, e' to te' non a ma pah to Jiu' to te' va'peh me ne raoe. E Pöl to vavaasis non raoe pan, manih pe Kristo o Jiu' me ro te' varih to hikta te' ne pan ee ro Jiu' to vatös e ne, ivëh, ka kuru no a napan kurus to te' vatös e ne me e Kristo po paeoh o kum. E Pöl to he' me a soe vapipino' va po kum pe Kristo pa kukön a tah. Ea a sionin e leesu', ke e', e susun pea. Me ea to te' va e no manih pa iuun pe Sosoenën, ke leesu' koman e' o toon vatopnin in a iuun pamëh. E Pöl to he' me a meh soe vapipino' pe' vamanih pan, o kum pe Kristo to te' va e non manih pe köövo pe'.

A ma kiun varih to tataki va ne manih pan.

A potan avih pe Pöl, 1:1-2

A soe va po iu pe Sosoenën me a vatös pea me e Kristo, 1:3-23; 2:1-22; 3:1-21

E' to vih non pa ö no a napan va po vaman se te' me ne o pöh kokoman,
4:1-16

E' to vih non pa ö no a napan va po vaman se soe vakoe a ma hanan va pa
popoen, 4:17-32; 5:1-20

E' to vih non pa ö no a napan va po vaman se he' i rea manih pa ma meh te'
va po vaman me a taate' iu te', 5:21-33; 6:1-10

Manih po kikis pe Kristo, a napan va po vaman se onoah ee pe susun po ora'
hat me o kum pe', 6:11-20

A soe ataaton pe Pöl, 6:21-24

1 ¹Eö' e Pöl e aposol pe Ieesu' Kristo. Ko iu koman pe Sosoenën kö' tavus aposol. Eö' to vanö ka nös neöm a napan pe Sosoenën varih to te' nem pa vöön va Ēfēsus o kiun va'ih. Suk eöm to vatös me voh e Ieesu' Kristo, paröm vavetet vakis nem eah sih.

²Eö' to hin e Sosoenën Tamaara, ke Sunön pea Ieesu' Kristo, pan ee se ururuan a neöm, pare nok a ma kokoman peöm köm te' me nem a taate' moomo.

**Manih Pe Ieesu' Kristo, Ne Sosoenën Se He' A Ra A
Ma Moeh Tah Vihvih Va Pa Vöön Va Kin**

³Ea se kë rakah no a ëhnan e Tamaara Sosoenën. E' me e Taman e Sunön pea Ieesu' Kristo. Manih po vatös pea ke Ieesu', ne Sosoenën koman to he' koe ka ra a ma moeh tah vihvih va pa vöön va kin nën. ⁴O poen ne Sosoenën to me' avoe' voh e non pa nok o oeh vëh, e' to kon voh en pea se vatös me no e Ieesu' Kristo, para tavus o te' vivihan, para hikta te' me no ta hat manih po epep pe Sosoenën. ⁵Suk ataeah, moaan voh no a taate' kamö' me o iu pe Sosoenën, se nok a ra, ka tavus o pus koa' pe'. Manih pa kiu pe Ieesu' Kristo, e' marën a kon tane' hah a ra manih pa taate' hat. Ko iu koman pe Sosoenën, ivëh, ke' nok va nën. ⁶Ivëh, ka manih pa ëhnan e koa' vëh ne Sosoenën to iu non sih poan, e Sosoenën to ururuan voh a ra. Ivëh, ka se kokoman tamoaan rakah no o ururuan apuh pe', para kë tamoaan no a ëhnaneah. ⁷A napan to ip vamët voh e Ieesu' Kristo, ka manih po era' pe', ne Sosoenën to kon hah këh a ra pa hat. Pare' ihan anoe en pa ma hat pea, ivëh, ka se vatös vavih rakah me e Ieesu' Kristo. Manih pa mët pe Ieesu' Kristo, ne Sosoenën to vamaaka o ururuan apuh pe' manih pea. ⁸Manih pa ma vu nat me a ma kokoman vih pe', ne' to koep rakah ma' o ururuan pe' manih pea. ⁹Moaan voh ne Sosoenën to kokoman keon voh en pa tah ne' to kehkeh nok voh non manih pa kiu pe Kristo. Ivëhkëk, o kokoman pamëh to te' vakoan voh e non. Ka kuru va'ih ne' to vataare en pea po kokoman pe'. ¹⁰Ivëh, ko kokoman pamëh, ne' to kehkeh nok voh non, to te' vavoh non manih pan, o poen ne' to koman non se tavus ma', e' se ununun a ma tah va pa vöön va kin, me a ma te' tah va po oeh manih pe Kristo, kee te' ne paan a pah te', ka pah te' ko pamëh e Ieesu', ivëh e Kristo.

¹¹E Sosoenën to vavetet non sih o iu me a ma kokoman koman pe', pare' nok a ma moeh tah, kee tavus. Moaan rakah voh ne' to vate' voh en pea, pan ea se vatös me no e Ieesu' Kristo. Para tavus a napan pe'. ¹²E' to nok vamanih pan, emöm varih a napan va Israël to vaman momoan voh e Kristo, ko vatet voh em pe'. Ke Sosoenën me to kon voh en pemöm, pan emöm se kë nem o ëhnan apuh pe', suk e' a Te' Sunön rakah. ¹³Ke eöm varih o te' to hikta te' nem pan eöm ro Jiu', eöm me to pënton vahik voh em pa soe man. A soe man pamëh, e' a Soe Vih pe Sosoenën. Ka soe

pamēh to kon tane' hah a neöm manih pa taate' hat. Eöm to vaman me voh em pe Kristo, ko vaman peöm nok a neöm, kōm vatōs me em pe'. E Sosoenēn to vatet rakah en pa soe man pe', ne' to soe vaman voh pan, e' se vanō ma' a Tuvuh Vasio' pe' manih peöm. Ka Tuvuh Vasio' pamēh to te' va non manih po vēknōm to vataare a non neöm manih pe Sosoenēn, kōm te' nem a napan pe'. ¹⁴Ea to nat e no pea to kon vahik voh ee pa Tuvuh Vasio', ivēh, ka nat va e no manih pan, amot na se kon me ee pa ma tah ne Sosoenēn to vamatop keon voh ka ra. Ka ma tah poē varih ne' to soe vaman voh pan, e' se he' a ra a napan pe'. Ea to anoeh voh e no pa kon a ma tah poē varih, po poen ne Sosoenēn se hehe vahik a ra a napan pe'. Ka kē no o ēhnan apuh pamēh, suk e' a Te' Sunōn rakah.

E Pōl To Hin E Sosoenēn Pan E' Se He' O Nat Manih Pa Napan Va Ēfēsus

¹⁵Ivēh, ko poen nō' to pēnton eo' peöm to vaman em pa Te' Sunōn vēh e Ieesu', parōm iu e nem pa ma napan kurus pe Sosoenēn. ¹⁶Ivēh, nō' to hikta vavanot suk no' sih pa soe vavihvih ke na e Sosoenēn, suk eöm. Ka ma poen kurus nō' to vaho' rakah a no' neöm manih pa ma hin peō'. ¹⁷Eō' to hinhin no' sih e Tamōn vēh to te' me non o kikis apuh ke Sunōn pea Ieesu' Kristo. Eō' to hinhin no' eah sih pan, e' se he' a neöm o nat, pare' vataare hah ea manih peöm kōm nat in eah. ¹⁸Eō' to hinhin me no' e Sosoenēn, pan e' se peret me a ma kokoman peöm kōm nat vavih a ma tah vihvih varih ne' to vaneah non ne' se he' a neöm. Eöm se nat nem, parōm vaman nem a ö nōm se kon em pa ma tah vihvih poē varih. Suk ataeah, e' to vaoe voh en peöm pa tavus o pus koa' pe'. Eō' to hinhin me no' e Sosoenēn, pan eöm se maaka vavih a ma he' vihvih varih ne' to soe vaman voh, pan e' se he' a neöm a napan pe'. ¹⁹Eō' me to hinhin no' pan, eom se nat va nem manih pan, o kikis apuh pe Sosoenēn, e' a tah a pah apuh rakah manih pea varih, a napan to vaman no eah. Ko kikis apuh pamēh to vatōe akuk va e non manih po kikis apuh vēh, ²⁰ne Sosoenēn to nok voh, pare' kunkuin hah e Ieesu', ko vaho' poan pa papmatō pe'. Manih pa vōön va kin no a napan to kē ne sih a ēhnaneah. ²¹E Sosoenēn to he' voh e Ieesu' Kristo a tasun to apuh oah e non po ora' eh, me ro te' susunōn, me a ma kaman, me a ma moeh tah kurus varih to te' me ne o kikis. Ko ēhnan apuh pe', apuh oah me e non po te' varih, to te' me ne o ēhnan kuru, me ro te' varih, se te' amot ne o ēhnan apuh. ²²E Sosoenēn to vaho' vahik voh en pa ma moeh tah kurus manih paan o kikis pe Kristo. Ke' te' va non manih pe susun va pa ma tah poē varih, marēn a va'aus o kum te' varih to vaman ne e Sosoenēn. ²³O kum te' varih to vaman ne e Sosoenēn, ee to te' va e ne manih pa sionin e Ieesu' Kristo. E' to he' o to'to' pe' manih po kum te' varih to vaman ne e Sosoenēn. Ko kum te' poē varih to puh ne po to'to' pamēh. Ivēh, ke Ieesu' Kristo koman to vapuh kurus voh en pa ma tah kurus varih to te' ne pa vōön va kin, me manih po oeh.

E Sosoenën To Va'aus A Ra Po Ururuan Pe'

2 ¹Moaan voh nöm to hikta vaman nem e Kristo, paröm te' va nem manih pa nap mët. Suk ataeah, eöm o vatösoe, paröm hikta tēnan nem a soe pe Sosoenën, paröm nonok vatēh nem a ma taate' hat. ²Manih pa tēem pamēh nöm to vavetet vavi' kov e nem pa taate' hat va po oeh vēh. Eöm to vatet voh a taate' hat pe susun po ora' hat varih to te' ne akis. Ke susun po ora' hat pamēh to te' avoe' e non manih pa komaara napan varih to vatösoe ne sih e Sosoenën.

³Moaan voh na to te' me voh e no po te' poē varih. Para vavetet vavi' e no po iu hat va pa komaara. Ea to vavetet voh no o iu hat va pa komaara, me a ma tah no o sionin me a ma kokoman pea to iu ne. Ko poen na to te' va no nēn, ea se kon o kamis ne Sosoenën to vamatop keon voh ken pea, a napan to nonok no sih a ma vu taate' hat poē varih.

⁴Ivëhkëk, o ururuan pe Sosoenën to parin apuh, ke' pah iu suntan rakah e non pea. ⁵Oman, a ma taate' vatösoe pea, me a taate' pēnton varo a soe pe Sosoenën to nok voh a ra, ka te' va e no manih pa nap mët. Ivëhkëk, e Sosoenën to vatös en pea ke Kristo, pare' he' en pea po to'to' voon. Ka manih po he' vih pe Sosoenën ne' to kon tane' hah en pea manih pa taate' hat. ⁶Ka vatös pea ke Kristo, ne Sosoenën to kunkuin va'peh suk hah en pea manih pa mët va po apen, pare' vaiho' en pea pa vöön va kin, ka iho' va'peh me e no pe', ko pēt matop e no pa ma tah va pa vöön va kin, ke Kristo. ⁷Manih pa kiu pe Ieesu' Kristo, ne Sosoenën to nok a taate' vih manih pea. Suk ataeah, e' to kehkeh vataare non a napan va amot, pan o ururuan apuh pe' to hikta te' non ta ö ataaton, manih pa ö ne' to vava'aus va ka rora sih. ⁸E' to te' va non manih pan, a tah pamēh to hikta te' non pan a tah nöm to nok. Ahik, e Sosoenën to he' akuk en peöm. Eöm to vaman voh e Ieesu' Kristo. Ke Sosoenën ururuan a neöm, pare' kon tane' hah en peöm manih pa hat. ⁹Ko he' vih pe Sosoenën to hikta te' non pan, o voen ovin a ma kiu nöm to nonok nem. Ivëh, ne' to hikta onöt suk non, pa ta pah te' se kë koman hah non a ëhnaneah. ¹⁰Manih pa kiu ne Ieesu' Kristo to nok voh, ne Sosoenën to nok a ra, ka tavus vavoon, para suksuk no a hanan va pa taate' totoopin. A taate' totoopin pamēh ne Sosoenën to vamatop keon ke voh en pea, pan ea se suksuk no.

**E Kristo To Vahik A Taate' Vakihat Po Jiu', Me Ro Te' Varih
To Hikta Te Ne Pan Ee Ro Jiu' Manih Pa Mët Pe'**

¹¹Ivëh, köm se kokoman hah na pan, eöm a napan to hikta tavus voh manih po vute' po Jiu'. Eöm o te' no a napan va Israël to sosoe ne sih pan, eöm o te' nee to hikta pe voh a ma ö kokoaan peöm. Ivëh, nee to sosoe suk a no neöm pan, eöm to hikta te' nem pan eöm ro Jiu'. Pare

sosoe me ne pan, ee a napan pe Sosoenën, suk a ö nee to pe a ma ö kokoaan pee. Ivëhkëk, a taate' pe a ö kokoaan va po sionin, e' a taate' po te'. A taate' pamëh to hikta antoen non a va'aus a te', ke' panih a taate' pe', ko tavus vavoon. ¹²Eöm se nat vavih rakah va nem manih pan, moaan voh nöm to hikta nat voh nem pe Kristo, paröm te' tavus këh e nem po kum te' va Israël. E Sosoenën to nok a soe man pe', pare' nok a ma vatompoan pe', me ra napan va Israël, ke eöm to te' tavus këh e nem po kum te' pamëh. Ka tëëm nöm to te' nem manih po oeh vëh, paröm hikta anoeh nem a ö ne Sosoenën se kon hah a neöm, suk eöm to hikta nat me nem pe Sosoenën. ¹³Moaan voh nöm to te' varo këh e nem pe Sosoenën. Ivëhkëk kuru va'ih, no era' pe Ieesu' Kristo to pupui a neöm, kôm vatös hah me em pe Sosoenën. E Sosoenën to vahuk hah a ma' neöm manih pe', suk o era' pe Kristo to tako' suk a neöm.

¹⁴E Ieesu' koman ivëh a pusun in a taate' vakamö', e' se nok a ra ka iho' va'peh hah. Moaan voh o Jiu' to vakihat me voh e ne po te' varih to hikta te' ne pan ee ro Jiu'. Ka taate' vakihat pamëh to sunpip voh e non pea o Jiu' me ra napan varih to hikta te' ne pan ee ro Jiu'. Ivëhkëk, e Ieesu' Kristo koman ivëh to nö ma' pare' vu' topnin a eean eh pamëh ko kök poan, pare' vavahik en pa taate' vakihat pamëh. E' to vatös o pöök vute' varih, o Jiu' me ro te' varih to hikta te' ne pan ee ro Jiu'. Kee tavus ee o pöh vute', ¹⁵suk e' to vahik en pa ma ö soe me o Vavaasis pe Mosës, po poen ne' to mët pa kuruse. E' to nok va nën, pan e' se ununun hah o Jiu', me ro te' varih to hikta te' ne pan ee ro Jiu', kee tavus hah ee a pah te', ko vakamö' hah ee. ¹⁶Ka manih pa mët pe Ieesu' manih pa kuruse, e' to vatös hah o Jiu' me ro te' varih to hikta te' ne pan ee ro Jiu', kee tavus hah ee a pah te', pare vakamö' hah me ee pe Sosoenën. Ivëh, nee to hikta vakihat suk hah ne. ¹⁷E Ieesu' Kristo to nö voh ma' manih po oeh vëh. Pare' vavaasis non a Soe Vih vëh, to sosoe suk non o vakamö' peöm a napan varih to te' varo këh nem e Sosoenën, me emöm o Jiu' to vatös nem manih pe Sosoenën. ¹⁸Ea vapöh kokoman, suk po' no ataeah, manih pa ëhnan e Ieesu' Kristo ne ea o pöök vute' to te' me no a Tuvuh Vasio', ka Tuvuh Vasio' pamëh peret ken pea pa hanan na se suk, para tavus manuh pa matan e Sosoenën, e Tamaara.

¹⁹Ivëh, ke eöm varih o te' to hikta te' nem pan eöm ro Jiu', moaan voh nöm to te' nem a nap aun, ivëhkëk kuru, eöm to hikta te' va nem nën. Eöm to tavus em a kën tom kea va po vaman manih pe Sosoenën. ²⁰Eöm to te' va nem manih pa iuun ne Sosoenën to eok. E' to vasun a möm o aposol, me ro te' vanënën soe vamanih po toon va pa iuun pamëh. Ke Ieesu' Kristo to te' va non manih po toon vatopnin to öt vakis non sih a iuun pamëh. Ivëh, ke ea kurus a iuun pamëh. ²¹Ka iuun to taeok vaeh manih pe Ieesu'. Ivëh, ke' tatavus nö e non a iuun vivihan pe Sosoenën. ²²Suk ataeah, eöm o te' varih to hikta te' nem pan eöm ro Jiu', eöm to

vatōs me voh em pe Kristo, ke' vatōs en peōm me ra napan pe'. Ivēh, kōm tavus va em manih pa iuun te'te' pe Sosoenēn manih po kikis pa Tuvuh Vasio'.

**A Kiu Pe Pōl Ivēh Pa Vatvus A Soe Vih Pe Ieesu' Kristo
Manih Po Te' Varih To Hikta Te' Ne Pan Ee Ro Jiu'**

3 ¹Eō' ivēh e Pōl, eō' to hinhin suk a no' neōm manuh pe Sosoenēn, eō' to te' no' pa nohnoh suk a ma kiu ne Sosoenēn to he' a neo', kō' nonok no'. E' to soe ka neo' pan, eō' se vavatvus no' a Soe Vih pe Ieesu' Kristo manih peōm o te' varih to hikta te' nem pan eōm ro Jiu'. ²Oman, eō' to koman no' pan, eōm to pēnton pō' voh em pe Sosoenēn to he' voh en peō' pa kiu va'ih. Manih po ururuan pe' nō' se nok a kiu pamēh marēn a va'aus a neōm. ³E Sosoenēn to vataare voh en peō' po kokoman vakoaan pe' vēh, to te' non sih manih po kupu pe'. Kō' vatvus pet voh keo' peōm pa si' ō sone' va po kokoman vakoaan pamēh manih po kiun peō'. ⁴Ko poen nōm se keh ēh a soe nō' to kiun suk o kokoman vakoaan pamēh, eōm se nat em, peō' to nat vamaaka e no' po kokoman vakoaan vēh, to soe suk non e Kristo. ⁵Moaan voh ne Sosoenēn to hikta soe tavus avoe' voh non o kokoman vakoaan pamēh manih pa napan. Ivēhkēk, kuru va'ih ne Sosoenēn to vatvus koe ke ma' a soe vakoaan pe' manih pa Tuvuh Vasio'. E' to vatvus ke ma' a soe pamēh manih pemōm a napan ne' to kon voh, kemōm tavus o aposol vivihan pe', me ro upōm te' varih to vavatvus ne a soe. ⁶O pus kokoman va pa soe vakoaan pamēh to te' va non manih pan, manih pa Soe Vih pe Ieesu' Kristo, ne eōm o te' to hikta te' nem pan eōm ro Jiu' to vaman nem, parōm tavus em a kēn kea va po vaman va'peh me emōm o Jiu' varih to vaman nem e Kristo, ka tavus ee o pōh sionin. Ea kurus to kokon koe ke no a ma tah vihvih ne Sosoenēn to vaneah keon voh ken pea manih pe Ieesu' Kristo.

⁷E Sosoenēn to nok voh a neo' kō' tavus eo' a te' kikiu pe', marēn a vatvus a Soe Vih pe' manih pa napan. Manih po kikis pe', ne' to he' a neo' o he' vih pe', marēn a nok a kiu pe'. ⁸Eō' to vapaan rakah ke no' a napan kurus pe Sosoenēn, ivēh, kō' hikta onōt no' a kon o he' vih pe'. Ivēhkēk, e Sosoenēn to ururuan a neo', pare' he' en peō' pa kiu pe', ka kiu pamēh, e' a kiu va pa vatvus a Soe Vih manih po te' varih to hikta te' ne pan ee ro Jiu'. Ka Soe Vih pamēh to vavaato vavi' suk e non pa ma tah vihvih pe Kristo. Ka ma tah vihvih poē varih ne ea a napan va po oeh vēh to hikta antoen no a kiiki me a ēh. ⁹E Sosoenēn to nok voh a ma moeh tah kurus, ivēhkēk e' to koaan momoaan voh en po kokoman pe' manih pa tah ne' to kehkeh nok non. Ko kokoman pamēh te' vakoaan tamoaan voh e non sih. Ivēhkēk, kuru ne' to he' en peō' pa kiu va pa vamaaka o kokoman vakoaan pamēh. ¹⁰Moaan voh ne' to koaan e non po kokoman vakoaan pe'. Ivēhkēk, kuru va'ih ne' to vatvus en pe' manih

po kum te' varih to vaman ne sih e Sosoenën. Ka manih pa taate' pamëh ne Sosoenën to nok a ma vu kokoman vihvih, me a ma vu nat vihvih pe', kee tavus vateera' koe ee manih po kum te' varih to vaman ne poë. Ivëh, no ankerō' eh, me ro tuvuh va pa vöön va kin to nat suk ne o kokoman vakoan pe Sosoenën. ¹¹Moan voh ne Sosoenën to me' avoe' voh e non pa nok o oeh vëh, e' he koman e non pa nok a tah pamëh. Ka manih pa kiu pe Sunön pea Ieesu' Kristo, ne' to nok vahik en pa ma tah poë varih. ¹²Ea to vaman e no sih e Kristo, para hikta nanaöp hah no a tavus manih pa matan e Sosoenën. Ea to nat va e no manih pan, e Kristo e' a hanan na se suk, para nö ko tavus na manuh pe', ka hikta tah se sunpip hah a ra. ¹³Ivëh, kö' se soe vakis rakah keo' peöm, eöm se koe a hara' vahat suk o kamis nö' to te'te' no' marën a va'aus a neöm, a ma vaman peöm tome' kunah. Eöm se hara' vaeö nem, suk ataeah, o kamis pamëh to tavus ma', marën a va'aus a neöm, köm te' vavih me nem e Sosoenën.

E Pöl To Hin Va'aus A Napan Pe Ieesu' Varih Ēfēsus

¹⁴Ivëh, kö' vatokon eo' manih pa matan e Tamaara, parō' hin vakis eo' pe' pan, e' se va'aus a neöm. ¹⁵E Sosoenën, e' e Tamaara napan va vöön va kin me manih po oeh, ke e' koman to vëvëhnan voh en pa ma vu tom taman kurus. ¹⁶Eö' to vavatokon no' sih, parō' hinhin va no' manih pan, e Tamön to te' me non o kikis pa nok a ma moeh tah vihvih peo. Ka manih po kikis pe', ne' to antoen e non pa vapuh a ma komëneöm pa Tuvuh Vasio' pe'. Pare' nok a neöm, ka ma kupu peöm eh rakah ee manih pe Sosoenën. ¹⁷Ivëh, kö' hinhin suk a no' neöm o te' varih to vaman voh em pe Kristo, pan e' se te' tamoan rakah non pa ma kupu peöm, ka taate' iu te' se eh rakah non manih pa ma kokoman peöm, köm sun vakis ko te' va nem manih pa ö no oeh to ötöön va e non a ma aan naon, ko naon sun vakis non. ¹⁸Eö' to hinhin suk a no' neöm manih pe Sosoenën, pan eöm varih o te' to hikta te' nem pan eöm ro Jiu', me ra napan pe Sosoenën, eöm kurus se kon o pöh vu kikis va pa nat vavih o iu apuh pe Kristo. Ea to hikta nat no, o iu pe' manih pea papanō' onöt non nih, me e' rë, aton non nih, me e' va kin vah va non nih, me e' ruruvun va non nih. ¹⁹Ivëh, ka nat e no pa hikta pah te' to onöt non a nat a ö ne Kristo to iu va ka rora sih. Ivëhkëk, ea to onöt e no pa nat eah. Kö' iu no' a ö ne Sosoenën se vapuh rakah a ra po to'to' pe'. Ko to'to' pe' se te' tera' non manih pea.

²⁰Eö' to hinhin avoe' e no' pan, o kikis pe Sosoenën koman ivëh, to kiu non sih manih pa komaara, ko kikis pamëh to te' oah e non po kokoman pea. Ka ma tah kurus na to hinhin suk no, ne Sosoenën se nok en pee, ka ma tah kurus poë varih to hikta onöt ne o kikis pe'. ²¹Ivëh, ka kuru me amot no a napan va po kum te' varih to vaman ne e Ieesu' se kë koe tamoan ke ne a ëhnan e Sosoenën manih pe Ieesu' Kristo. Oman.

Ea A Napan Se Vatös Tamoaan Me No E Kristo

4 ¹Eö' e Pöl, eö' to te' no' pa nohnoh, eö' to te' suk no' nën, eö' to nonok no' a kiu pe Sunön. Eö' me to koman no' pan, e Sosoenën to vaoe voh a neöm, pan eöm se vatet a taate' pe'. Ivëh, kö' iu kunkuin no' a ma kokoman peöm, pan eöm se suk a taate' totoopin, me eöm se vatet varoe o iu pe'. ²Eöm se kunah ke ra napan pe Kristo, paröm nok a taate' to vatö non a ma komëere. Eöm se nat nem heve raee, pa ö nee se nok vaheve a neöm. Eöm papaeh se he' raee o kokoman vih, paröm te' a ma punis varih nee to he' a neöm, suk eöm to iu nem raee. ³A Tuvuh Vasio' to he' voh en pea pa taate' vapöh kokoman. Ka taate' pamëh to te' va non manih po uris to noh vatös a rora ka tavus o pöh vute'. Ivëh, köm se sun vakis rakah nem ko matop nem a taate' pamëh. ⁴Ea varih a napan va po vaman, ea to te' va e no manih po pöh sionin, para te' me no a pah Tuvuh Vasio' to te' non manih pea. E' a tah ne Sosoenën to vaoe suk a ra, pan ea kurus se anoeh no a kon a pah tapui vih ne' to soe vaman voh, pan e' se he' a ra. ⁵Ea kurus to te' me no a paeh a Sunön, para vaman no o pöh vavaasis, para kon a paeh a pupui. ⁶E' to te' non a paeh a Sosoenën. Ke Sosoenën pamëh, e' ro a paeh e Tamaara a napan kurus. Ka tasun pe' to apuh, pare' te' oah e non pa ma te' tasun pa ma napan kurus. Pare' kiu tamoaan non topniira napan pe', pare' te' hop tamoaan e non manih pa ma napan kurus varih to vaman ne poë.

⁷Ivëhkëk, e Kristo to he' vakëkëh voh en pea pa ma vu he' na se nonok no a kiu pe'. Ea papaeh to kon a ma vu he' poë varih, suk e Ieesu' Kristo koman to ki vakëkëh ka ra a ma he' poë varih po iu koman pe'. ⁸Ivëh, no Puk pe Sosoenën to soe suk va non manih pan,

“O poen ne' to peah manuh pa ö va kin vörep,

pare' kon a nap nohnoh peo, kee nö va'peh me ee pe'.

Pare' he' en pa napan pa ma he'.”

Sng 68:18

⁹Ka soe va'ih, “E' to peah en pa ö va kin vörep,” e' a soe pamëh to vataare va ka rora manih pan, e Kristo to hikta peah varoe voh manuh pa ö va kin, ahik, po vamomoaan rakah ne' to kunah voh ma' manih po oeh vëh. ¹⁰Ka te' vëh to kunah voh ma'. E' kuru a te' ko pamëh to peah hah en. Ka manih pa ö pamëh to va kin oah e non pa ma meh tah va akis. E' to nö nën marën a matop a ma moeh tah kurus. ¹¹A te' pamëh, e Kristo to he' voh a napan a ma vu he', e' to he' a ma vu he' poë varih to te' va ne manih. Manih po upöm, ne' to he' raee a kiu aposol, ko he' o meoh upöm te' a kiu pa vatvus a soe. Ka ma meh ne' to he' raee a kiu pa nö vavah pa vatvus a Soe Vih pe Ieesu' Kristo manih pa napan. Pare' kon en pa ma meh te' pa nok a kiu va pa matop me a vavaasis a napan pe Sosoenën. ¹²E Kristo to he' a ra a ma he' poë varih marën a va'aus a ra a napan pe Sosoenën, ka onöt e no pa nok a ma kiu vihvih pe' manih

pa va'aus o upöm te'. Ivëh, ke ea varih a napan to te' va no manih pa sionin e Kristo, ea se tavus vaeh, para te' vavih no. ¹³Ivëh, ka ma kiu na to nonok no, se nönö nö kov e ne, pare' öök rakah na pa ö na se vapöh kokoman manih po vaman. Para nat vavih ee pe Koa' pe Sosoenën, ko puh rakah ee pa ma taate' vih pe Kristo. Ka ma taate' pe' tavus vateera' ee manih pea.

¹⁴Ea se te' va no nën, para nat no te' vatëh va no manih po koa' sosone'. A ma soe varih no a nap vamanman te' to nonok ne sih, suk ee to nat vavih e ne sih pa taate' vatomore, me a taate' piuk. A ma taate' poë varih to hikta onöt ne a toon vavah va ka ra manih pa ö no a tuvuh me a supa to totoon vah va i non o sini manih tahi'. Ea me se nat no vanun o vaman pea, ke' nun ko te' va non manih pa ö no sini to nönö pinpiun vah non, pare' hikta tavus na manuh pa ö ne' to nönö non to tavus. ¹⁵Ivëh, ka se nat rakah no vaho' no a ma tenara manih pa ma soe poë varih. Ahik, ea se vavatet vavi' no a taate' iu a meh te', para sosoe ro ke no raoe a soe man. Ea se keh nonok va no nën, ea se tavus rakah ee o te' eh manih pa taate' vaman, ko vatös me e Kristo, ke' tavus en a te' se vovoh ka rora a napan pe'. ¹⁶E Ieesu' Kristo to vatös me en pa napan pe', ke' te' va non manih pa sionin a te'. A ma ö kurus varih pa sionin a te' to te' vatös non, ko sionin kikiu vavih non, pare' tavus vaeh en. E' to te' vatoe va e non manih po kum te' varih to vaman ne e Sosoenën. A ma papaeh pee se keh iu ne a ma upöm pee, pare nok a ma kiu pee, a, a ma kum poë varih to pu vaeh ee manih po kikis pe Kristo.

**Ea Varih A Napan Pe Kristo Ea Se Panih A Ma
Taate' Hat Pea Para Suk A Taate' Voon**

¹⁷Manih pa ehnan e Sunön, eö' to kehkeh soe ka no' neöm a pah soe peö'. A soe kikis peö' to te' va non manih, eöm se nat nem suksuk vatëh nem a taate' pa napan varih to hikta nat ne pe Sosoenën. A ma kokoman pee to nun rakah voh ee. ¹⁸Suk ataeah, a soe pee to hat, kee hikta onöt ne a nat vamaaka e Sosoenën, pare hikta iu kon ne o to'to' voon vëh ne Sosoenën to he'he' non. Ee o vatösoe, pare hikta nat ne pa hanan pe Sosoenën. ¹⁹Ee to hikta potpoet suk ne a ma taate' hat nee to nonok ne, ee to vaho' hop rakah rea manuh po iu hat va po sionin. Ka ma kokoman pee rikrik suk e ne pa nok a ma taate' hat.

²⁰Ivëhkëk, a taate' pe Kristo no a napan to vavaasis a non neöm, to hikta te' va non manih. Ahik. ²¹Eö' to nat e no' peöm to pënton vahik voh em pa soe man pe Kristo. Ee to vavaasis vahik voh ee peöm pa ma vu taate' ne' to iu non, na se suksuk no. ²²Moaan voh nöm to suksuk nem o iu hat va pa komëneöm, ka ma taate' hat poë varih, ivariv, a taate' piuk a meh te', me a taate' karë pa nok a taate' hat. Me a taate' rëh koe a te' manih pa hanan va pa nok a taate' hat. Ka kuru va'ih nöm se koe rakah

a ma taate' hat poë varih. ²³⁻²⁴Ka kuru nö' to iu no' a ö nöm se panih o iu hat va pa komëneöm, paröm kon o iu voon manih pa komëneöm. Ka ma kokoman peöm se tavus vavoon rakah. Köm tavus em a nap voon. A nap voon poë varih ne Sosoenën to nok raee, kee tavus va ee manih pe' koman. Suk ataeah, a ma taate' pee to totoopin pare vivihan vavi' vamanih pe'.

²⁵Ivëh, köm se vakah rakah a taate' piuk, vamanih pa ö no Puk Vapenpen to soe va non,

Paröm sosoe tamoaan ke nem a napan pe Sosoenën a ma soe man.

Suk ataeah, ea kurus, ea to te' va e no manih po pöh sionin.

Sek 8:16

²⁶A ma kokoman peöm se keh hara' vahat po heve, köm matop nem, peöm tome' nok em pa ta hat. Eöm se koe a öt o heve, ke' öök pa tëem no a potan se roko'. ²⁷Eöm me se nat nem he' rakah ta ö sone' ne susun po ora' hat se koe ke ma', pare' mirö' o vamomhë vih peöm. ²⁸A te' vëh to te' voh non a te' kakaveo, e' se nat non kakaveo hah non. E' se kiu vëhva' rakah pa koreneah, pare' kon po' a taëen to onöt non a ö ne' se va'aus koman hah ea, me a ma meh taneah ne' to antoen non a va'aus o te' arus.

²⁹O poen nöm to vavaato me nem a meh te', eöm se nat nem nok ta soe to vahara' vahat non eah. Eöm se soe varoe a soe vih vëh, to antoen non a va'aus o te' varih no vaman pee to kökööt non manih pa ma kupu pee. ³⁰Eöm se nat nem nok ta tah to vatamak non a Tuvuh Vasio' pe Sosoenën. E Sosoenën koman to he' voh en peöm pa Tuvuh Vasio' pamëh, ke' te' va e non manih, po vëknöm to vataare a non neöm a napan pe'. Ko vëknöm pamëh to vataare e non peöm pan, e Sosoenën se kon hah a neöm, köm tavus këh em ma' pa hat va po oeh vëh. ³¹Eöm se varakah rakah a taate' rës suntan a meh te', me a taate' heve ov in a meh te', me a taate' to va'puh, me a taate' hikan te' ke' hara' vahat, me a ma meh taate' hat na to nat e no. ³²Eöm se nok varoe a taate' vih manih po upöm napan pe Kristo, me eöm se he' a komëneöm manih pee. Eöm me se ihan anoe a ma hat pee, vamanih pa ö ne Sosoenën to ihan anoe vavoh in a ma te' hat peöm manih pa ehnan e Kristo.

Ea Se Suksuk Rakah No A Taate' Va Po Maaka

5 ¹E Sosoenën to iu rakah a no neöm sih, pare' nok a neöm, köm tavus em o pus koa' pe'. Ivëh, köm se vatet vavih a ma taate' ne e' koman to iu non. ²Eöm se suksuk nem a taate' iu te', vamanih pa ö ne Kristo to iu vavoh ka rora, pare' kon a tasun pea, ko he' o to'to' pe' pa ö ne' to mët manih pa kuruse. E' to he' voh o to'to' pe' manih pa mët vamanih po he' avoavuh vih, nee to ës ke na e Sosoenën ke' vaeö.

³Eöm se koe a nok vatëh a taate' te'te'vaasi', me a ma meh taate' rëhrëh, ke' e voe to koroh vëtkin me a meh voe, ke' e' to koroh vëtkin

me a vōna', ke' a tah hat taeah, parōm koe a manin a ma tah kurus po upōm te'. A ma taate' pōe varih se nat ne tatavus ne manih topninneōm a napan pe Sosoenēn. Suk ataeah, ea a napan pe Sosoenēn, ea to hikta se vavasoe suk no a ma vu taate' poē varih. ⁴Eōm se nat nem nonok nem ta ma soe pō, me ta ma vaato nun, me eōm se nat nem nonok nem ta ma vu vakō hat. A ma taate' poē varih to hikta vih ne pa ö na se nonok no. E' to vih varoe non peōm se soe vavihvih ke na e Sosoenēn. ⁵Eōm se nat vavih va nem manih pan, a napan varih to nonok ne sih a taate' te'te'vaasi', me a ma meh taate' rēhrēh, me a napan varih to mamanin ne sih a ma tah po upōm te', a ma taate' poē varih to matan va e ne manih pa napan varih to hinhin ne o sosoenēn varih to hikta te' man ne. Ee a napan poē varih to hikta antoen ne a hop manih pa Matop Vih pe Ieesu' Kristo, ke Sosoenēn matop non raeo.

⁶Eōm se matop vavih nem, pe' to hat non peōm tome' vatet ta ma vakō hat po te' varih to kehkeh rēh ke a ne neōm, kōm nok a ma taate' hat poē varih. A ma taate' akuk ko poē varih to vaheve ne e Sosoenēn, ke' vakmis en pee. Suk ee to pēpēnton varo ne a ma soe pe'. ⁷Ivēh, kō' sosoepip rakah e no peōm, pan eōm se koe a vatōs me a pap te' poē varih. ⁸Suk ataeah, moaan voh nōm to te' voh nem pa popoen. Ivēhkēk kuru va'ih, neōm to tavus em a napan pe Sunōn ke' vamaaka en pa ma kokoman peōm. Ivēh, kō' iu no' a ö nōm se nōnō va nem manih pa napan varih to suksuk ne o maaka. ⁹O tēkrea pe Sosoenēn to te' non manih peōm, kōm vavatvus nem a ma moeh taate' vih man, me a ma taate' totoopin, me taate' va pa soe man. ¹⁰Eōm se punō' vēhva' rakah pa nat a taate' taeah to vavaeō non e Sunōn. ¹¹Eōm me se koe a vamomhē me ra napan varih to nonok ne sih a ma taate' va pa popoen. A ma vu taate' poē varih, to hikta onōt ne a vavoa' a taate' vih. Ahik rakah, e' to vih non peōm se vataare a pap te' poē varih, pan a taate' pamēh, e' a taate' to para' hat rakah. ¹²Eō' to hikta onōt no' a soe tavus a ma taate' hat, nee to vakoaan ne pare nonok ne sih. Eō' to te' me e no' po poet pa vaato suk a ma taate' poē varih. ¹³Ivēhkēk, o tēkrea pe Sosoenēn se vataare en pea, pa pusun in a ma taate' poē varih, kee tavus vateera' ko te' e ne po maaka. ¹⁴Ko poen no tēkrea pamēh se keh ēman non manih pa ta pah tah, a tah pamēh to tera' en. Ivēh, ka soe va'ih to te' va non manih, “Eōm varih a napan to koroh nem po vapeepe, eōm se sun. Ke Kristo se he' en peōm po tēkrea pamēh.”

¹⁵Ivēh, kōm se matop vavih rakah nem pa ma taate' nōm to suksuk nem. Eōm se nat nem nōnō va nem manih po te' to hikta nat ne pe Sosoenēn. Ahik, eōm se te' rakah va nem manih pa te' natsean. ¹⁶Kuru nōm to te' me nem pa tēem nōm se nok a taate' vih pe Sosoenēn, ivēhkēk, o poen na to te' no kuru, e' o poen hat no a napan to nonok ne a ma taate' hat. Ivēh, kōm se te' vamatop nem, pe' o poen va pa nok a ma

taate! vih tome! hik akuk ee. ¹⁷Eöm se nat nem suksuk nem a ma taate! me a ma kokoman no a napan va po oeh vëh to nonok ne sih. Eöm se nat varoe ko nem pataeah ne Sunön to iu non paröm vatet. ¹⁸Eöm me se koe a kaak vatëh o voaën, suk ataeah, a taate! kaak to mimirö' e non pa ma to'to' peöm. Ivëhkëk, eöm se vaonöt ka Tuvuh pe Sosoenën puh manih peöm, pare! matop non a ma kokoman peöm. ¹⁹Eöm se vaëhëh me nem a ma meh napan pe Sosoenën, marën a vaeh o vaman pa ma paeh peöm. Eöm se kon a ma vaëhëh varih to pet ne po Puk Vaëhëh, me manih pa ma meh vaëhëh va po hin, me a ma vaëhëh no a Tuvuh Vasio! to vatvus manih pa ma komëneöm, nöm se vaho! hop manih pa ma vaëhëh peöm. Paröm vaëhëh a ma tah vaëhëh varih to kë ne a ëhnan e Sunön manih pa ma rivoeneöm, me manih pa ma kokoman peöm. ²⁰Eöm se sosoe vavihvih tamoan ke nem e Sosoenën Tamaara, suk a ma moeh tah varih pa ëhnan e Sunön pea Iesu! Kristo.

E Pöl To He' O Vavaasis Manih Pa Nap Vavaen

²¹Eöm se tēnan rakah a soe ko vapaan ke nem a ma meh kea peöm. Suk ataeah, eöm to ta e nem pa ëhnan e Kristo to te' me non a tasun me o kikis apuh.

²²Ke eöm varih o köövo, eöm se pēnton nem a ma soe pa ma kēn voe peöm ko te' nem paan, vamanih pa ö nöm to pēnton va nem sih a soe pe Sunön. ²³Suk ataeah, a te' oete!, e' to susun ke non sih e köövo pe', vamanih pa ö ne Kristo to susun ke non sih o kum te' varih to vaman ne sih e Sosoenën. O kum te' poë varih to vaman ne sih Sosoenën, ee to te' va ne manih pa sionin e Kristo. Ke Kristo koman ivëh, to kon hah o kum napan pe' poë varih. ²⁴O kum te' varih to vaman ne sih Sosoenën, ee to te' ne paan e Kristo. Ke' te' va e non manih peöm o köövo, eöm se te' tamoan nem paan a ma voe peöm.

²⁵Ke eöm varih a kēn voe, eöm se iu rakah nem a ma köövo peöm, vamanih pa ö ne Iesu! Kristo to iu vavoh in o kum te' varih to vaman ne sih e Sosoenën, pare! he' o to'to' pe', marën a va'aus o kum pamëh. ²⁶Manih pa ruen, me a soe, ne Kristo to pupui o kum te' varih to vaman ne Sosoenën, pare! ep non raoe to te' voon ne manih pa mataneah. Ka manih pa taate! pamëh, ne' to kon o kum pamëh, kee tavus ee o kum te' ne' to vaneah non, pan ee o kum pe'. ²⁷Ivëh, ko kum te' poë varih se te' vivihan tamoan ne, ka hikta hat se te' non manih pee. E Kristo to iu nok non o kum te' varih to vaman ne e Sosoenën, se matan vavih rakah ne manih pa mataneah. E' to te' va non manih pan, o kum te' poë varih no a hikta ta ö korë, me a meh taeah to onöt non a mirö' raoe. ²⁸E' to te' akuk va e non manih pan, eöm varih a kēn voe, eöm se iu rakah nem a ma köövo peöm, vamanih pa ö nöm to iu hah va ka nem. A te' vëh to iu rakah non e köövo pe', e' to iu koman hah me a non. ²⁹Ea to nat e

no pa hikta pah te' to rēs hah non sih a sionineah, ahik, a te' pamēh to matop vavih non sih a sionineah, ko mamakēn non, pare' matop vavih e non pe'. E' to te' akuk va e non manih pa ö ne Ieesu' to matop vavih va i non o kum te' varih to vaman ne Sosoenēn. ³⁰Suk ataeah, ea to te' va e no manih pa sionin e Kristo. ³¹Ka soe to kiun non manih po Puk pe Sosoenēn to soe va non manih pan,

“Ivēh, ke voe se kēh ma' e tamaneah pen sinaneah,
pare' vatös me e köövo pe',
kee tavus ee pon o pöh sionin.”

Jen 2:24

³²Manih koman a soe va po Puk pe Sosoenēn, no kokoman apuh rakah to te' non manih pe'. Manih peö' to koman no' pan, a soe va'ih to sosoe suk non e Kristo me o kum te' varih to vaman ne e Sosoenēn. ³³Ivēhkēk, a soe pamēh to sosoe suk me e non peöm papaeh, eöm se iu rakah a ma köövo peöm, vamanih pa ö nöm to iu hah va ka nem. E köövo se te' non paan e voe pe', pare' vasunön non poan.

**E Pöl To He' A Soe Vanat Pe' Manih Po Koa', Me
Ma Kēn Tamēere, Me Ra Ma Kēn Sinēere**

6 ¹Eöm varih o pus koa', eöm se vatet rakah a ma soe pa ma tamēneöm me a ma sinēneöm, suk ataeah, eöm to vatös me voh em pe Sunön. Ka taate' pamēh nöm to nok, e' a taate' totoopin manih pa matan e Sosoenēn. ²Ka soe to kiun non manih po Puk pe Sosoenēn to soe va non manih pan,

“Eöm se pēnton a ma soe pa ma tamēneöm, me pa ma sinēneöm,
ko vatet a ma soe pee.”

Eks 20:12; Lo 5:16

Ka taate' va'ih, e' a taate' vamomoaan to te' me non a soe vaman pe Sosoenēn. ³Ka tah ne' to nok suk voh pa soe vaman pe', ivēh,

“Eom se keh pēnton a soe pa ma tamēneöm me a ma sinēneöm, A, a ma tah vihvih se tavus ee manih peöm,
köm te' varē em manih po oeh vēh.”

Eks 20:12; Lo 5:16

⁴Ke eöm varih a ma kēn taman, eöm se nat nem vavaheve nem a ma pus koa' peöm. Ivēhkēk, eöm se matop vavih varoe raeo. Paröm vakömköm nem raeo, ko vavaasis nem raeo o vavaasis pe Sunön.

E Pöl To Vavaasis Non O Te' Kikiu Akuk, Me Ra Ma Torara Pee

⁵Ke eöm varih o te' kikiu akuk, eöm se ta rakah nem a ma torara peöm varih to te' ne manih po oeh vēh. Eöm se nanaöp nem raeo paröm iu nem raeo pa ma kupu peöm. Eöm se tēnan nem a ma soe pee, vamanih pa ö nöm to tēnan va i nem a soe pe Kristo. ⁶Eöm se nat nem te' va nem manih po te' kikiu akuk varih to vamanman ne sih a ma torara pee manih pa ma kiu nee to nonok ne, ka ma torara pee he ut ne raeo. Eöm se nok rakah a ma kiu me a ma kupu peöm vamanih pa ö ne Sosoenēn to iu va non. Ke

eöm varih, eöm se koman vamanih pan, eöm o te' kikiu akuk pe Kristo to kiu vakis e nem pa ma poen kurus. ⁷Eöm se kokoman vavih paröm nonok nem a ma kiu peöm, eöm se nat nem koman va nem manih pan, eöm to nonok nem a kiu va'ih suk ta pah te'. Ahik. Eöm to nonok me e nem pa kiu pe Sunön. ⁸Eöm se kokoman hah va nem manih pan, e Sunön to he' en po voen vih pe' manih pa napan kurus varih, to nonok ne sih a ma kiu vihvih. E' se he' o voen vih pamēh manih po te' kikiu akuk me ro te' taihan.

⁹Ke eöm varih o te' to vavakiu nem sih o te' kikiu akuk, eöm se matop vavih rakah nem raoe, paröm varakah rakah a taate' va'naöp o te' kikiu akuk peöm. Suk ataeah, e Sunön to te' non pa vöön va kin, e' me e Sunön peöm me ro te' kikiu akuk. Eöm me se kokoman va nem manih pan, a Te' vēh e Torara peöm e' me e Torara po te' kikiu akuk to te' non manuh pa vöön va kin. E' to matop va e non pee manih pa ö ne' to matop va ka non neöm.

A Napan Pe Kristo Ee To Te' Va E Ne Manih Pa Nap Vëvënsun

¹⁰Kuru nö' to kehkeh vahik va i no' a soe peö' manih pan, eöm se vatös me e Sunön, paröm kon o kikis pe'. Eöm se vaonöt ko kikis apuh pe' vakikis a neöm. ¹¹A te' vëvënsun to ohop non a ma ohop vavapus me pe', marën a ö ne' se vapus. Ivēh, ke eöm me, eöm se vamatop pa vakiu a ma tah ne Sosoenën to he' a neöm, marën a vapus me e susun po ora' hat, ko poen ne e' e susun po ora' hat to punö' pa vatomore me a neöm, köm vöknah rakah a soe pe'. ¹²Eö' to soe a soe va'ih, suk ea to hikta vavapus me no a napan va po oeh va'ih, ahik, ea to vavapus me no o ora' hat me a ma vapöök susun pee varih to matop ne sih a napan va po oeh vēh, to te' ne pa popoen. Ea to vavapus me no o ora' hat va kin to te' me ne a ma vu kikis. ¹³Ke' ivēh, a pusun in a ö nö' to soe suk va ka neöm manih pan, eöm se vamatop pa ohop a ma ohop vavapus, ne Sosoenën to he' a neöm, marën a vöknah e susun po ora' hat. Ivēh, ko poen no a hat pamēh se tavus ma', eöm to antoen rakah e nem pa vöknah o ora' hat poë varih. Ivēh, ka tēēm nöm to nok vahik a ma tah nöm to antoen nem a nok, eöm se sun vakis avoe' rakah kov e nem.

¹⁴Ivēh, köm se te' vamatop nem pa vapus me e susun po ora' hat, eöm se te' va nem manih pan, eöm se soe a soe man, a soe man pamēh to te' va non manih po voh no a te' vëvënsun to voh non. Eöm se nok a taate' to te' totoopin non manih pa matan e Sosoenën. Ka taate' pamēh to te' va non manih po ohop nee to nok pa ta tah eh, ke' sunpip non a ma poeneöm. ¹⁵Eöm se te' vamatop tamoan nem pa vatvus a Soe Vih to soe suk non o kokoman tö ne Sosoenën to he' voh ma'. Eöm se vaho' va in a Soe Vih pamēh, vamanih peöm to ohop nem a su'.

¹⁶Eöm pet me se vaman tamoan nem e Sosoenën. Ka taate' vaman peöm pamēh te' va e non manih po këpro' to sunpip a no neöm. O vaman

peöm to matop e non peöm, köm te' tavus këh e nem po vakmis vëh ne susun po ora' hat se punö' pa nok manih peöm. O këpro' pamëh to se te' va non manih pa ta tah vavapus me po te' vëvënsun, to vövömte' e non pa ma avan tëtëkrea varih, no e tövakihat to vanvan non ma'. ¹⁷Eöm se kokoman hah va nem manih pan, e Sosoenën to kon hah voh en peöm manih pa hat ko matop e non peöm. Ka taate' pe Sosoenën pamëh se te' va non manih po uvan eh vavapus nöm to uvan nem. Me eöm se pënton vavih rakah a soe pe Sosoenën no a Tuvuh Vasio' to he' a neöm. A soe pamëh to te' va non manih po rapis rë nöm to öt nem. ¹⁸Eöm se hinhin tamooan rakah nem a Tuvuh Vasio'. Paröm eh rakah nem pa hin, suk a ö ne' se va'aus a neöm. Eöm se ut vavih tamooan nem, paröm nat nem vanun, me a vanot pa nok a taate' hin. Eöm se hinhin tamooan nem e Sosoenën ke' se va'aus a napan kurus pe'.

¹⁹Eöm se hin e Sosoenën ke' va'aus a neo', pare' vaho' a soe manih pa rivoneo', kö' hikta se nanaöp no' a soe vamaaka ke ra napan a soe vakoan pe Sosoenën. ²⁰E Ieesu' Kristo to kon voh a neo', kö' kon voh a tasun pe' parö' vavaasis no' a napan pa Soe Vih. E' akuk kuru a tah pamëh nee to papanih pip suk voh a neo' koman a iuun nohnoh. Ivëh, kö' iu no' a ö nöm se hin vakis e Sosoenën, ke' vakikis a neo' kö' vöknah a taate' naöp, ko soe tavus a Soe Vih pe Ieesu' Kristo manih pa napan, parö' nat no' nanaöp no'.

**E Pöl To Hin Suk A Napan Varih To Te' Me Ne O
Vaman, Ke Sosoenën Se Tapui Raoe**

²¹E Titikus se soe vanat en peöm pa ma kiu kurus varih nö' to nonok no', ke Titikus koman, e' e kea vamaman rakah pea, nö' to pah iu suntan e no' pe'. Me e' koman a te' kikiu vamaman rakah pe Sunön. ²²E' akuk a tah nö' se vanö suk nös eah manih peöm, pan e' se soe vanat a neöm emöm te' vah va nem nih manih, me e' se vakikis o vaman peöm.

²³Eö' to hinhin suk a no' neöm pan, e Sosoenën e Tamaara pen sunai'eah Ieesu' Kristo se he' a neöm o kokoman tö, me a taate' kamö'. Ee se nok a neöm, ko vaman peöm eh köm iu ro upöm te'. ²⁴Me eö' to hinhin no' e Sosoenën se vataare a taate' ururuan pe' manih pa napan kurus varih to iu ne Ieesu' Kristo e Sunön pea. Ko iu pa napan poë varih se hikta te' me non ta ö ataaton.